

Երևանի պետական համալսարանում գործող  
ՀՀ Բարձրագույն որակավորման կոմիտեի  
իրավագիտության 001 մասնագիտական խորհրդին  
(հասցե՝ 0025, Հայաստանի Հանրապետություն,  
ք. Երևան, Ալեք Մանուկյան փողոց 1)

**ԿԱՐԾԻՔ**  
**ՊԱՇՏՈՆԱԿԱՆ ԸՆԴԴԻՄԱԽՈՍ,**  
**ԻՐԱՎԱԲԱՆԱԿԱՆ ԳԻՏՈՒԹՅՈՒՆՆԵՐԻ ԴՈԿՏՈՐ,**  
**ՊՐՈՖԵՍՈՐ ՎԱՇԵ ՍՏԵՓԱՆՅԱՆԻ**

Արփինե Առաքելյանի՝ «Մարդու իրավունքների եվրոպական դատարանի վճիռների ազդեցության գնահատումը (Հայաստանի Հանրապետության օրինակով)» վերտառությամբ ԺԲ.00.02 - «Հանրային իրավունք - սահմանադրական, վարչական, ֆինանսական, մունիցիպալ, բնապահպանական, եվրոպական իրավունք, պետական կառավարում» մասնագիտությամբ իրավաբանական գիտությունների թեկնածուի գիտական աստիճանի հայցման համար ներկայացված ատենախոսության վերաբերյալ

Ատենախոսության թեման ունի ակնհայտ արդիականություն: Դա պայմանավորված է այն հիմնավորմամբ, որ Մարդու իրավունքների եվրոպական դատարանի (այսուհետ՝ ՄԻԵԴ) վճիռների և դրանց ազդեցության համակարգի, ձևերի ու առանձնահատուկ դրսևորումների արժեքանական նշանակության բացահայտմանն ուղղված յուրաքանչյուր գիտական հետազոտություն անկասկած համակարգային նշանակություն ունի հատկապես իրավաբանական դոկտրինում իրավական այդ երևույթի վերաբերյալ տեսական և միասնական մոտեցումների ձևավորման համատեքստում:

Բացի այդ, համաձայնելով հեղինակի տեսակետին, գրախոսության ներկայացված ատենախոսության առանձնահատկությունն այն է, որ Եվրոպական դատարանի վճիռների ազդեցությունը, հաճախ դուրս գալով պատասխանող պետության

սահմաններից, ընդգրկում է նաև այլ պետությունների իրավական համակարգերը: Հենց այս հանգամանքով պայմանավորված՝ անհրաժեշտություն է առաջանում գնահատել յուրաքանչյուր դեպքում Մարդու իրավունքների եվրոպական դատարանի վճիռների ազդեցության ծավալն ու դրանից բխող պարտավորությունները (էջ 4):

Այդուհանդերձ ատենախոսության թեմայի և՛ տեսական, և՛ գործնական արդիականությունը նաև պայմանավորված է ներկա ժամանակաշրջանում Մարդու իրավունքների եվրոպական դատարանի վճիռների ազդեցության համարժեք գնահատման անհրաժեշտությամբ՝ ոչ միայն Մարդու իրավունքների և հիմարար ազատությունների պաշտպանության մասին եվրոպական կոնվենցիայի վավերացմամբ ստանձնած պարտավորությունների պարեխիղճ կատարումն ապահովելու առնչությամբ, այլ նաև եվրոպական դատարանի կողմից իրավունքի զարգացման հեռանկարների կանխորոշման ու ներպետական իրավական համակարգերը դրան նախապատրաստելու անհրաժեշտությամբ (էջ 4-5):

Թեմայի հետազոտման տեսագործական հրատապությունը կարևոր է հատկապես հաշվի առնելով այն հանգամանքը, որ Մարդու իրավունքների եվրոպական դատարանը 2021 թվականից սկսած, փոխելով իր կողմից գործերի քննության առաջնահերթության քաղաքականությունը, հատուկ կարևորությամբ ընդգծել է «ազդեցություն ունեցող գործեր» (impact cases) կատեգորիայի ներքո ընդգրկվող գործերի քննության հատուկ ընթացակարգի սահմանման անհրաժեշտությունը: Այս առումով հեղինակն իրավացիորեն ընդգծել է Մարդու իրավունքների եվրոպական դատարանի վճիռների ազդեցության համակարգի ու վերջինիս տարրերի ուսումնասիրության անհրաժեշտությունը, ինչը հետագայում կնպաստի նոր կատեգորիայի ներքո քննված գործերով կայացված վճիռների ազդեցության սահմանների ճիշտ տարբերակմանը:

Վերոշարադրյալից բացի հեղինակը հիմնավորել է ընտրված թեմայի արդիականությունը նաև գիտագործնական որոշ խնդիրների լուծման անհրաժեշտությամբ պայմանավորված:

Աշխատանքում ուշադրություն է հատկացվել Հայաստանի Հանրապետությունում իրավաստեղծ և իրավակիրառ գործունեության նկատմամբ ՄԻԵԴ-ի վճիռների ազդեցության ուսումնասիրմանը, վեր են հանվել գործնականում առկա խնդիրներ, օրենսդրական թերի կարգավորումներ՝ ընդգծելով վերոշարադրյալ հարցերը նոր դիտանկյունից վերլուծելու կարևորությունը:

Ատենախոսության մեջ հստակեցված են հետազոտման ենթակա հարցադրումները, որոնք տրամաբանական հաջորդականությամբ, գիտական-վերլուծական հետազոտությունների արդյունքում հանգում են կոնկրետ դատողությունների՝ պահպանելով մտքերի պատճառահետևանքային կապը:

Հեղինակն անհրաժեշտ խորությամբ դիտարկել է հետազոտության առարկային անմիջականորեն առնչվող առավել արդիական հարցադրումները, ինչի արդյունքում արված եզրահանգումները հիմնավորված են, իսկ պաշտպանության ներկայացված դրույթները բնորոշվում են ինքնատիպությամբ և ունեն գիտական արժեք:

Վերը նշվածը հիմք է տալիս դրական գնահատել պաշտպանության ներկայացված ատենախոսությունը: Միևնույն ժամանակ աշխատանքում տեղ են գտել որոշ թերություններ, որոնց կապակցությամբ ներկայացնում եմ հետևյալ նկատառումները.

1. Աշխատանքի 1-ին գլխում հեղինակը դիտարկում է ՄԻԵԴ-ի վճիռները որպես մարդու իրավունքների պաշտպանության նվազագույն չափորոշիչների ձևավորման աղբյուր՝ այսպիսով բացահայտելով ՄԻԵԴ վճիռների ազդեցության ինքնատիպ դրսևորումը մարդու իրավունքների պաշտպանության իրավական չափորոշիչների համակարգի ձևավորման վրա: Սակայն, կարծում եմ, որ այս համատեքստում հարկավոր էր առավել մեծ ուշադրություն դարձնել միասնական եվրոպական փոխհամաձայնության դոկտրինին, քննարկման առարկա դարձնելով այն հնարավոր իրավիճակները, երբ կոնկրետ դեպքում ՄԻԵԴ-ի կողմից արտահայտված իրավական դիրքորոշումներով սահմանվում է մարդու իրավունքների պաշտպանության չափորոշիչ,

սակայն տվյալ հարցի կապակցությամբ դեռևս առկա չէ միասնական եվրոպական փոխհամաձայնություն (էջ 32-42):

2. Ատենախոսության 2-րդ գլխի շրջանակներում հեղինակն անդրադառնում է ՄԻԵԴ վճիռների ազդեցության գնահատման համակարգին և ազդեցության գնահատման մեթոդներին: Հեղինակը փորձել է հասարակական գիտությունների ուսումնասիրության շրջանակներում օգտագործվող «ազդեցության գնահատում» եզրույթի բովանդակության բացահայտման արդյունքների վրա կառուցել ՄԻԵԴ-ի վճիռների ազդեցության գնահատման համակարգը՝ տալով հեղինակային սահմանում ՄԻԵԴ-ի վճիռների ազդեցության գնահատման համակարգին: Այնուամենայնիվ, հեղինակին ամբողջությամբ չի հաջողվել բացահայտել այդ սահմանման հիմքում ընկած հստակ աղբյուրագիտական և մեթոդաբանական հիմքերը (էջ 43-55):

3. Ատենախոսության 2-րդ գլխի 4-րդ ենթագլխում, հեղինակը ՄԻԵԴ-ի վճիռները դիտարկելով միջազգային սահմանադրական արդարադատության համատեքստում, նշում է. «Թիվ 11 արձանագրության ուժի մեջ մտնելուց և մշտական հիմունքներով գործող դատարանի ձևավորումից հետո Եվրոպական դատարանին ներկայացվող գանգատներով բարձրացվում են անդամ պետություններում մարդու իրավունքների տարաբնույթ խախտումները, որոնց քննության և իրավական գնահատականներ տալու համար Եվրոպական դատարանն ուսումնասիրում և վերլուծում է ներպետական իրավական կարգավորումները՝ հաճախ բացահայտելով նաև առկա սահմանադրական հակասությունները»: Այս առնչությամբ հարկ է նշել, որ աշխատանքը առավելապես կշահեր, եթե դրանում ներկայացվեր ՄԻԵԴ-ի կողմից բացահայտված անդամ պետությունների սահմանադրական կարգավորումների հակասությունների որոշ օրինակներ (էջ 66-82):

4. Հեղինակին չի հաջողվել ամբողջությամբ զերծ մնալ օտարաձին տերմիններից, որոնք նկատվում են աշխատանքի տարբեր ենթագլուխներում, սակայն կարծում եմ, որ

որանց կիրառումը երբեմն արդարացված է հաշվի առնելով այն հանգամանքը, որ մասնագիտական գրականության մեջ հանդիպող և կիրառվող համարժեք եզրույթը ոչ միշտ է ամբողջությամբ արտացոլում նույն իմաստն ու բովանդակությունը:

Այնուամենայնիվ, անհրաժեշտ է նշել, որ հեղինակի կողմից արված եզրահանգումները հիմնականում բխում են ատենախոսության ընդհանուր տրամաբանությունից, համապատասխանում առաջադրված նպատակներին ու խնդիրներին:

Ատենախոսությունը շարադրված է հասկանալի ու գիտական ոճով, հեղինակը ապահովել է նյութի շարադրանքի ներքին տրամաբանությունը: Ատենախոսությունն ունի ավարտուն տեսք և հանդիսանում է հստակ շարադրված գիտավերլուծական աշխատություն:

Պաշտպանության ներկայացված հիմնադրույթները համապատասխանում են ներկայացվող պահանջներին՝ ինչպես նորույթի, այնպես էլ հիմնավորվածության չափանիշներով:

Ատենախոսությունում պաշտպանության ներկայացված հիմնադրույթները համարժեքորեն արտացոլված են հեղինակի կողմից հրատարակված գիտական հոդվածներում:

Սեղմագիրն արտացոլում է ատենախոսության հիմնական դրույթներն ու բովանդակությունը:

Հաշվի առնելով վերոգրյալը՝ կարծում եմ, որ Արփինե Առաքելյանի՝ «Մարդու իրավունքների եվրոպական դատարանի վճիռների ազդեցության գնահատումը (Հայաստանի Հանրապետության օրինակով)» վերտառությամբ իրավաբանական գիտությունների թեկնածուի գիտական աստիճանի հայցման համար ներկայացրած թեկնածուական ատենախոսությունը համապատասխանում է Հայաստանի Հանրապետության կառավարության 1997 թվականի օգոստոսի 8-ի թիվ 327 որոշմամբ հաստատված՝ «Հայաստանի Հանրապետությունում գիտական աստիճանաշնորհման կանոնակարգի» 7-րդ կետի պահանջներին, իսկ հեղինակն արժանի է ԺԲ.00.02 - «Հանրային իրավունք - սահմանադրական, վարչական, ֆինանսական, մունիցիպալ,

ընապահականական, եվրոպական իրավունք, պետական կառավարում» մասնագիտությամբ իրավաբանական գիտությունների թեկնածուի գիտական աստիճանի շնորհմանը:

**Պաշտոնական ընդդիմախոս,  
իրավաբանական գիտությունների դոկտոր,  
պրոֆեսոր**



**Վ.Վ. Ստեփանյան**

26 հունիսի 2023 թ.

**Պաշտոնական ընդդիմախոս, իրավաբանական գիտությունների դոկտոր,  
պրոֆեսոր Վահե Ստեփանյանի ստորագրությունը հաստատում եմ՝**

ԵՊՀ իրավագիտության ֆակուլտետի դեկանի տեղակալ, իրավաբանական գիտությունների դոկտոր, պրոֆեսոր

**Հ.Մ" Խաչիկյան**

27 հունիսի 2023 թ.

